

- Grant bien leur fissent mains loppins
 Aux povres filles (ennementes !)
 Qui se perdent aux Jacoppins, 1574
- CXLIX Aux Celestins et aux Chartreux ;
 Quoy que vie mainent estroite,
 Si ont ilz largement entre eulx
 Dont povres filles ont souffrete ; 1578
 Tesmoing Jaqueline, et Perrete,
 Et Ysabeau qui dit : « Enné ! » ;
 Puis qu'ilz en ont telle disette,
 A paine en seroit on damné. 1582
- CL Item, a la Grosse Margot,
 Tres douce face et pourtraicture,
 Foy que doy *brulare bigod*,
 Assez devote creature ; 1586
 Je l'aime de propre nature,
 Et elle moy, la douce sade :
 Qui la trouvera d'aventure,
 Qu'on luy lise ceste ballade. 1590

BALLADE

[B. de la
 Grosse Margot.]

Se j'ayme et sers la belle de bon hait,
 M'en devez vous tenir ne vil ne sot?
 Elle a en soy des biens a fin souhait.
 Pour son amour sains bouclier et passot ;
 Quant viennent gens, je cours et happe ung pot, 1595
 Au vin m'en fuis, sans demener grant bruit ;
 Je leur tens eaue, frommage, pain et fruit.
 S'ilz paient bien, je leur dis : « *Bene stat* ;
 Retournez cy, quant vous serez en ruit,
 En ce bordeau ou tenons nostre estat ! » 1600

Mais adoncques il y a grant deshait,
 Quant sans argent s'en vient couchier Margot ;
 Veoir ne la puis, mon cuer a mort la hait.
 Sa robe prens, demy saint et surcot,
 Si luy jure qu'il tendra pour l'escot. 1605
 Par les costés se prent, « c'est Antecrist »
 Crie, et jure par la mort Jhesucrist
 Que non fera. Lors j'empoingne ung esclat ;
 Dessus son nez luy en fais ung escript,
 En ce bordeau ou tenons nostre estat. 1610

Puis paix se fait, et me fait ung gros pet,
 Plus enflee qu'ung vlimeux escharbot.
 Riant, m'assiet son poing sur mon sommet,
 Gogo me dit, et me fiert le jambot.
 Tous deux yvres, dormons comme ung sabot. 1615
 Et, au resveil, quant le ventre luy bruit,
 Monte sur moy, que ne gaste son fruit.
 Soubz elle geins, plus qu'un aiz me fait plat ;
 De paillarder tout elle me destruit,
 En ce bordeau ou tenons nostre estat. 1620

Vente, gresle, gelle, j'ay mon pain cuit.
 Je suis paillart, la paillarde me suit.
 Lequel vault mieulx? Chascun bien s'entresuit. 1623
 L'ung vault l'autre ; c'est a mau rat mau chat.
 Ordure amons, ordure nous assuit ;
 Nous deffuyons onneur, il nous deffuit,
 En ce bordeau ou tenons nostre estat. 1627

CLI

Item, a Marion l'Idolle
 Et la grant Jehanne de Bretaigne
 Donne tenir publique escolle
 Ou l'escollier le maistre enseigne. 1631